

02 NOV 1998

Mahathir-Nobel

MAHATHIR CABAR SAINTIS MALAYSIA MENANGI HADIAH NOBEL

KUALA LUMPUR, 2 Nov (Bernama) -- Datuk Seri Dr Mahathir Mohamad malam ini mencabar masyarakat saintifik Malaysia supaya menampilkan seorang pemenang hadiah Nobel sebelum tahun 2020, dan menyeru mereka menjadikan Malaysia sebagai antara negara terkemuka di dunia dalam sains dan teknologi.

Perdana Menteri berkata, saintis-saintis tempatan sebelum ini telah membuat banyak penemuan dalam pelbagai bidang sains, kejuruteraan dan teknologi (S.E.T).

Semasa berucap mengenai "Sains dan Teknologi - Asas Pertumbuhan Ekonomi dan Kemakmuran" di majlis makan malam Akademi Sains Malaysia di sini, Dr Mahathir berkata negara akan beruntung jika akademi itu mengambil inisiatif untuk mendokumenkan semua penemuan-penemuan itu.

"Walaupun penemuan-penemuan itu sekali-sekala, ia menunjukkan Malaysia mempunyai ahli-ahli sains dan penyelidik yang mampu mengendalikan penyelidikan peringkat tinggi".

"Dengan itu, saya mencabar masyarakat saintifik Malaysia untuk menampilkan seorang pemenang hadiah Nobel sebelum tahun 2020," kata Perdana Menteri.

Perdana Menteri juga menyeru masyarakat saintifik tempatan untuk memperkenalkan sesuatu atau membentuk sesuatu; untuk terus mencabar pemikiran lama dengan idea-idea baru; terus cari pengetahuan baru dan selesaikan masalah-masalah.

"Kita perlu berusaha gigih untuk kecemerlangan dan dalam proses itu menjadikan Malaysia sebagai antara negara terkemuka di dunia dalam bidang sains dan teknologi," kata Dr Mahathir.

Beliau berkata, saintis perlu mengambil kesempatan daripada infrastruktur dan kemudahan yang disediakan oleh kerajaan dalam usaha mereka untuk membuat penemuan.

Dr Mahathir berkata kerajaan tetap komited dalam menggalakkan S.E.T.

"Kita telah merumuskan dasar, sediakan infra-struktur dan memperuntukkan sumber kewangan. Tetapi lebih daripada itu kita memerlukan masyarakat saintifik dan industri membawanya lagi ke depan," kata beliau.

Dr Mahathir juga meminta masyarakat saintifik tempatan supaya membentuk teknologi dan inovasi kejuruteraan tersendiri untuk mengurangkan kos teknologi import dan kemungkinan inovasi mereka itu dieksport untuk mendapatkan bayaran royalti.

"Malaysia akan membelanjakan wang bagi penyelidikan, khususnya penyelidikan gunaan. Pemulihan ekonomi boleh dipercepatkan dan kita boleh bangkit daripada krisis itu lebih utuh lagi," katanya.

Dr Mahathir berkata, Malaysia sebagai negara membangun tidak mempunyai tabungan yang cukup untuk penyelidikan asal dan gunaan, royalti yang dibayar oleh Malaysia untuk teknologi-teknologi yang diimport setiap tahun adalah tinggi.

"Ini sudah pasti akan mengalirkan keluar pendapatan pertukaran asing kita. Pada waktu-waktu krisis ekonomi seperti sekarang ini, kita tidak mampu mengalirkan keluar dana kita," kata beliau.

Beliau berkata, usaha terbaru oleh kerajaan untuk memperkukuhkan kedudukan ekonomi negara ialah menubuhkan Koridor Raya Multimedia (MSC) yang akan membuka laluan bagi Malaysia untuk bersaing dalam era teknologi maklumat.

Dr Mahathir juga berkata, hari ini banyak tekanan dikenakan untuk

membuka pasaran dan negara-negara kepada semua, tetapi tiada tekanan seperti itu untuk memastikan sains, kejuruteraan dan teknologi disediakan bagi setiap negara dan semua orang.

"Sebenarnya tekanan untuk melindungi harta intelek semakin kuat hari ini berbanding pada bila-bila masa dalam sejarah. Jentera institusi antarabangsa dan kerajaan-kerajaan yang berpengaruh digerakkan untuk melindungi harta intelek."

"Nampaknya ada sesuatu yang tidak betul dengan ini. Mengapa sedangkan pasaran tidak boleh dilindungi, harta intelek dilindungi tidak kira apa kosnya dan pasaran itu mungkin pula satu-satunya aset bagi negara-negara miskin," katanya.

Dengan berkata "satu pilihan perlu dibuat di sini." Dr Mahathir berkata "jika kita ingin melindungi harta intelek maka kita juga mesti melindungi pasaran."

Perdana Menteri berkata, ataupun secara alternatif dunia perlu menekankan yang pasaran dan harta intelek bebas untuk semua.

-- BERNAMA

ES PR